

## 2 Timoteo

### Pablumi ishkay kaq kartanta kaçhan Timoteuman

Apustul Pablo Roma pwiblupi prisu karmi, kay kartata Timoteuman iskribiran. Timoteuqa Éfeso pwiblupimi kaq kriyiq masinkunata Jesucristupaq yaçhachiran. Pablutaqa, Jesucristupa shumaq rimayninta yaçhachikur purishanraykumi, karguyjunkunaqa wanuchinanpaqna karanllapa. Manaraq wanuyarmi, kay kartata Timoteuman kaçharan, tukuy imapi Tayta Dyus munashannulla kawsananpaq.

#### Pablumi saludakun

**1** <sup>1-2</sup>Kusala munashay wamray Timoteo, Taytanchik Dyusmi arnimanchikllapa tukuy tyimpupaq kawsayta. Chaymi kananqa pay munashannulla akramasha Jesucristupa apustulnin kar, rir chay washamana-llapapaq nimashanchikllapata yaçhachikunaypaq. Chaymi kay kartata iskribishuni. Chaqa Taytanchik Dyusta, chaynulla Amitunchik Jesucristutapis, mañakuni kusata llakipar tukuy imapi yanapashutin kusala shumaqta kawsanaykipaq nir.

#### Jesucristupaqqa amami pinqakurchu yaçhachikushunllapa

<sup>3</sup>Allita yarpuy, imanumi unay rukuykunamapis Taytanchik Dyuslata sirbiqllapa nir. Chaynullami nuqapis paylata sirbini. Chaymi ashwan paypa naypanpiqa mana ima mana allintapis rurasha yupaychu yarpuni. Chaynu karmi payman mañakurqa mana qunqashurchu tuta, unaq karmapis payji nir ima qampaqqa mana shaykuq

mañakuni Dyusninchikmanqa. <sup>4</sup>Chaqa kusalatami yarpuni imanumi qamlata dijashutiyyqa llakir waqaq kanki nir. Chaymi ashwan kananqa imanupis rikashuyta munani, qamwan kusalata aligriyanaypaq. <sup>5</sup>Chaqa imanutaq unaymaqa agwilayki Loida, chaynulla mamayki Eunicemaqa kusala chiqapta Amitunchiklapi kriyiqllapa, chaynullami qampis chiqapta kriyinki nir yaçhani. <sup>6</sup>Chaymi kusalata rugashuni imanutaq nuqa makiyta anaykiman çhurar, Taytanchik Dyusman mañakutiy, payqa imata ruranaykipaq nishuran chaylapina yarpur, ama imamanta manchakur imachu mastana ruranaykipaq. <sup>7</sup>Chaqa Taytanchik Dyusqami yanapamashanchikllapa mana imamanta manchakur imachu kawsanallapapaq. Ashwanmi payqa pudirninwan yanapamashanchikllapa kaynu kawsanallapapaq: Llakipanakur, imatapis tantyakar rurar, tukuy mana allin kaqkunapimapis shachinakunallapapaq ima.

<sup>8</sup>Chaymi nishaykipis: Amami pinqakunki imachu kusa allinla Amitun-

chik Jesucristupaq rimanaykipaqqa. Chaynulla amami pinqakunki imapischu Jesucristurayku nuqa prisu katiymapis. Ashwanmi Amitunchikpaq yačhachiku-shaykirayku qischashutinllapamapis, Taytanchik Dyus pudirninwan yanapashuyashanwan shachinakunki, tukuy chay qischakaykunapiqa. <sup>9</sup>Chaqa allita yarpuy, manami nuqanchik allinta rurashanchikraykuchu Dyusqa washamashanchik. Ashwanmi pay munamarninchik mana uchayjunpaqna-chu riqsir washamashanchikllapa, pay munashannulana kawsanallapapaq. Piru chaynu washamanallapapaqqa manami chayraqchu payqa yarpusha. Ashwanmi Jesucristurayku washamanallapapaqqa yarpushallana karan, kay pachamapis manaraq kayatin imachu. <sup>10</sup>Chaymi Amitunchik Jesucristo kanan tukuy nuqanchikkunapaq rurashanwan allitana intrachimanchikllapa imanumi payqa chiqapta munamanchikllapa nir. Chaqa payqami chaynu wanur imaqa chay tukuy tyimpupaq wanunapaq karan chaytaqa limpuna binsiran. Chaymi ashwan kananqa paypi kriyishaqa tukuy tyimpupaq kawsay-tana qumanchikllapa.

<sup>11</sup>Chaqa Tayta Dyusmi nuqataqa tukuy kaykunata [mana Israel runakunata] parlanaypaq nimasha. Chaynullami paypa apustulnin, yačhar yačhachikuqnin, paypa rimaqnin ima kanaypaq nimasha. <sup>12</sup>Chayraykumi chaynu yačhachikur imaqa kusalata qischakayanimapis. Piru chaynu qischakarmapis manami chayraykuqa pinqakunichu. Chaqa nuqaqami allita yačhani mayqanpimi kriyir kunfyakani nirmapis. Chaynulla kunfyakanimi pay imanupis pudirninwan imamantapis washamar shumaqlata purichimayanqa maydiya chay jwisyu diya čhamunanka-man nir.

<sup>13</sup>Chaynullami nishaykipis: Imanutaq nuqa yačhachishuray, chaynullami qampis Jesucristupi kriyiq kashaykinu allita yačhachikunki. Chaynami ashwan maydiyapis Jesucristupaq llakir imana kawsanki. <sup>14</sup>Chaynullapismi Santu Ispiritu nuqanchikpi kawsar yanapamashanchiknulla, allita kwintata qukar karanlata yačhachikunki, imanutaq yačhachikunaykipaq nishushaynulla.

<sup>15</sup>Chaqa allita yačhashaykinumi, tukuyta Asia pwiblumanta kriyiq masinchikkunaqa nuqalatana dijamin, manana kwintachamaranllapanachu. Chaynullami ukninchik Figeluan, Hermogenesmapis dijaminanllapa.

<sup>16</sup>Piru Amitunchik Jesucristumi Onesiforupa ayllunta llakipanqa. Chaqa paymi ayka kuti nuqataqa kusalata animachir aligriyachimaran. Chaynulla nuqa prisu katiymapis, manami payqa nuqamantaqa pinqakuranchu.

<sup>17</sup>Ashwanmi Roma pwibluman čhashannu, mana shaykuq maskamaran. Chaymantami tarimaran. <sup>18</sup>Chaynullami qamqa allita yačhankipis imanumi kusata payqa Éfeso pwiblupi yanapamanchikllapa nirmapis. Chaymi ashwan chay jwisyu diya čhamutinqa Amitunchik Jesucristuqa kusalata llakipar washanqa.

#### Jesucristupa allinla suldadunna kayllapa

**2** <sup>1</sup>Nataq qam wamray Timoteo, Jesucristumi kusala allin kar tukuy imapi yanapashuyan. Chaymi ashwan qamqa kusalata shachinakur imatapis payllapaq ruray. <sup>2</sup>Chaqa qam pullay kashaykiraykumi yačhanki, imanumi achka runakunata Jesucristupaq yačhachiray nirmapis. Chaymi paykunaqa nuqapaqqa tistigukuna yupayna, chiqaptami yačhachikuray nir. Chay-ari qampis, chay yačhachishushay-

taqa kaynu kaq runakunata yaĉhachiy: Karanlata ruraqkunata, yaĉhachikuyta puytiqkunata ima. Chaynami paykunapis ukkunatana yaĉhachinanllapapaq.

<sup>3</sup>Chaynullami nishaykipis: Jesucristupi kriyishaykirayku qischashutinllapaqa shachinakuy uk kusala allin suldadu yupay, ama kwashayar imachu.

<sup>4</sup>Chaqa yaĉhashanchiknu, uk suldadu sirbikuqqami, chay mantaqnin nishanlata ruran, manami yanqa wakin mana sirbikuq runakuna munashantachu ruran. <sup>5</sup>Chaynullami pasan uk pukllaqwanpis. Chaqa uk pukllaqqami imanumanu pukllananpaq kaqkunata allita kasur pukllayta ministin. Nataq mana kasur sunsunulla pukllaraqami, mana imatapis ganayta puytinchu.

<sup>6</sup>Chaynullami uk tarpukuqpis puntataqa kusalata trabajayaraq ministin. Chaymantaraqmi kusa aligrila kusichakuytaqa puytin. <sup>7</sup>Chaymi kay kumparas-yunkunapaq imanutaq kanqa nir yarpupakur intrakanatkiqa, Amitunchik Jesucristumi allita intrachishunqa tukuy kaykunapaqqa.

<sup>8</sup>Allita yarpuyllapa: Imanutaq nuqa yaĉhachikushaynu Jesucristo wanur kawsamusha chayqami, unay gubyirnu Davidpa ayllunmanta karan. <sup>9</sup>Chaymi chaynu nir ima Jesucristupaq yaĉhachikushayrayku, kusalata qischamatinllapamapis shachinakuni. Chaynulla uk wanuchikuqta yupay kadinakunawan ima watar qischamanllapa. Piru chaynumapismi, Taytanchik Dyuspa rimayninta-shuypaqa mana imanumanu wataymatapis puytinllapachu. <sup>10</sup>Chayraykumi nuqaqa kusalata qischakarmapis shachinakuni, Taytanchik Dyus akrashankunata animachinaypaq. Chaynuqami Jesucristupi masta kriyir, washakarna rir paywan tukuy tyimpupaqna kawsananllapapaq chay kusa shumaq mantakuyninlapina.

<sup>11</sup>Chaymi allita intrakayllapa kay chiqap kaqpaq nishanllapakunata. Chaqa ninmi:

Jesucristurayku wanurqashi, payllapaq kawsamuyashunllapa.

<sup>12</sup>Chaynulla qischakar shachinakurqashi,

maydiyaya Amitunchikwanna mantakuyashunllapa.

Piru nuqanchikkuna, payta mana riqsinichu nishaqa, paypis mana riqsishunichu nimashun.

<sup>13</sup>Chaynulla nuqanchikkuna payta sirbiyar, imanupi disanimakushamapis, payqa mana dijamayninchikta puytinchu.

Chaqa pay kusalata munamanchikllapa nir arnimashanchikllapana karqa, manami qashan niyta puytinchu mananami munashunillapachu niytaqa.

#### Dyuspa allinla

#### trabajadurninkunana kashunllapa

<sup>14</sup>Kriyiq masiy Timoteo, wakin kriyiq masinchikkunapaq yarpur, Tayta Dyuspa shutinlapi kutir kutir willay amana paykunapura willanakur imanachu kawsananllapapaq. Chaqa chaynu willanakur ima kawsayqami mana allinchi. Ashwanmi chaynu saqrata willanakur imaqa chay uyakumaqinchikkunata animachinamantaqa limpu pantachinchikllapa.

<sup>15</sup>Chaymi ashwan imanullapis Dyusninchik munashannula chiqap nishanlata yaĉhachikuy. Chaynuqami Dyusninchikpa naypanmanqa qimikanki kusa allinla trabajadur yupayna, mana imapaq pinqakur imanachu. Chaymi ashwan Dyusninchikqa nishunqa: “Kusa allintami rurashayki” nir. <sup>16</sup>Chaynulla

amami kay pachapi yanqalla mana allinkunata rimanllapa chaykunataqa rimankichu. Chaqa chaynuta rimaqkunaqami waran waranqa, kusa mana allin kaqkunata ruraqna çhurakanllapa. <sup>17</sup>Chaymi chay rimar yaçhachikushankunaqa wakta kayta shikwakan imanutaq uk qiri qishaymaqa wakta, kayta inkunar ismur rin chay yupay. Chaymi ashwan chay Himeneuwan, Filetutapis chaynulla pasasha. <sup>18</sup>Chaqa paykunaqami Dyusninchik nishanmanta kusala ukman mana allinta yaçhachikur ninllapa: “Michka wakinkuna kawsamusha katinmapis, kananqa manana kawsamunqallapanachu” nir. Chaynu nir yaçhachikurmi wakinninchikkunataqa, kriyishanmantaqa limpu pantachishallapa. <sup>19</sup>Piru chaynu katinmapis nuqanchikkunaqa kriyishanchikllapanulla shachinakushunllapa. Chaqa payqami chay kriyishanchikllapapiqa uk simintu allita çhurakasha yupay. Chaymi chay simintullapi iskribikashaqa nin: “Amitunchikqami tukuyta paypa kaqninkunataqa allita riqsin” Chaynullami nimpis: “Tukuy paylapi kriyir aduraqkunaqashi, chay mana allin kaqkunamantaqa chiqanchakashunllapa” nir.

<sup>20</sup>Yaçhashanchikllapanu, chay kusa imayjun runakunapa wasinpiqa matinkunamapis manami urulamanta, platalamantachu kan. Ashwanmi qirumanta, napa allpamanta rurakasha ima kan. Piru tukuy kaykunaqa namami chay kutillaqa sirbiyta puytinchu. Ashwanmi chay kusa çhaniyjun chaykunaqa, wasinllapaman kusa runa nishakuna çhatin sirbir qarananlapaq sirbin. Nataq chay mana yaqqa çhaniyjun kaqkuna-shuypaqami mana. <sup>21</sup>Chaymi nishayki: Mayqanpis chay kriyishannulla maydiyapis shachinakur,

manana mana allinkunata ruraqkunaqami, uk kusala shumaq kupa urumanta rurakasha yupayna kanqa nir. Chaynu karqami, Amitunchikpaqqa kusala sirbiqnin karna, tukuy imatapis allinkunalata ruraqkunana kanqallapa.

<sup>22</sup>Kriyiq masiy Timoteo, yaçhashanchiknumi musu karllaraqqa das imakunata yarpur rurar das uchakushana rikarinchik. Chaymi qamtapis musu kashaykirayku chaynu pasashuyanman nir yarpur nishuni, amana chaynu tukunaykipaq nir. Ashwanmi kriyishaykirayku, imatapis karanlata rurar, llakipanatur ima shumaqlata kawsayllapa tukuy shunqunwan Amitunchikpi allita kriyir paylata aduraqkunawan pulla. <sup>23</sup>Chayraykumi chay illaqmanta imalapaq willanakuqkunamanqa, ama imalapaqpis yakapankilamapischu. Chaqa allita yaçhashaykinu, mayqanpis chaynu willanakuyarqami, piñachinatur maqanakunllapana. <sup>24</sup>Chaqa Amitunchik Jesucristupa sirbiqninkunaqami, mana imapaq willanakur ima kawsananpaqnachu. Ashwanmi mayqanwan willanakunamantaqa kaynu kanqallapa: Tukuywan kusala allin, listuna wakinkunata yaçhachinanpaq, chaynulla amami das piñakuq imachu kanqallapapis. <sup>25</sup>Piru chaynu yaçhachikurqami chay mana intrakaqkunataqa yaçhachishun llakipar ima, ama kusa kani ima nirchu. Chaynuqami rurashun Dyus munatinga tukuy uchankunata dijar chay chiqap kaqlata kasur kawsanman nir yarpur. <sup>26</sup>Chaynuqami paykunapis kwintata qukanqallapa: Dyablupa makinpi kar munashanta rurayasha kanillapa nir. Chaynami imanullapis alsakar chay dyablu prisu purichir imuraspis pay munashanta rurachiyashanmantaqa washakanqallapa.

**Jwisyu diya shipchamutinqami  
kusala ukmanta tukunqallapa**

**3** <sup>1</sup>Chaynulla kriyiq masiy, kaytapismi allita intrakanaykita munani. Chaqa jwisyu diya çhamunanpaq shipchana katingami, kay pachapiqa mana yaçhakuypaqnachu kanqa nir. <sup>2</sup>Chaymi chay tyimpuqa runakunaqa pay munashanlata rurur, ashwan kusala qillayniyun ima kaylata munanqallapa. Chaynulla kusa kani ima nir alabakar, Taytanchik Dyuspaqmapis kusala mana allinta rimaq kanqallapa. Chaymi ashwan taytanllapata imamapis mana kasunqallapanachu. Chaynulla chay kriyishanllapamatapis mana kwintachar imachu, ashwan kusalata imatapis musyarlla kawsanqallapa. <sup>3</sup>Chaynulla chay runakunaqami, mayqantapis mana llakipar imachu tukuylawan kusalata piñakur ima mana shunqakaylamatapis yaçhanqallapachu. Chaymi ashwan mana kashanmanta ukkunata uchachar, mana tanyakar, kusala saqra mana allinkunata tukunqallapa. Chaynu karmi tukuy allin kaqtaqa kusalata çhiqningqallapa. <sup>4</sup>Chaymi paykunaqa ukninkunapaq imalatapis dasna ukkunata parlanqallapa. Chaynulla kusala marraju imami chay runakunaqa kanqa. Chaynu karmi, kusa kani nir munashanlata rurur, Dyusnichiktaqa mana kwintachanqallapanachu. <sup>5</sup>Paykunaqami Amitunchikpi chiqapta kriyiq yupay tukunqallapa. Piru chaynu kusala mana allinta rurur kawsayashanwanmi intrachimashunllapa mana chiqap kriyiqkunachu nir.

Chaymi nishaykillapa: Amami chaynu runakunawanqa imalapaqpis piçhuna-kunkillapalamapischu nir. <sup>6</sup>Chaqa chay runakunaqami chay kusala uchayjun warmikuna ukta ukta yarpuqkunapa wasinman yaykur ingañanqallapa.

Chaqa chay warmikunaqami mana uklapi kriyiq kar, imata nitinllapapis uyakur munashanlata rurur kawsanqallapa. <sup>7</sup>Chaymi chay warmikunaqa imata nitinllapapis kusalata yaçhakuyta kamanqallapa. Piru chaynu karmapismi chay chiqap allinla kaqpaqqa mana intrakayta puytinqallapachu. <sup>8</sup>Chaqa imanutaq unaymaqa chay ishkey brujukuna Janeswan Jambresmaqa, Moiesta kusalata çhiqniranllapa, chaynumi chay runakunapis, chiqap allinla kaqtaqa kusalata çhiqningqallapa. Chaqa chay runakunaqami mana allin yarpuyniyunachu kanqallapa. Chaynu karmi Tayta Dyuspi kriyinanpaq chaymatapis manana kwintacharnachu kawsanqallapa. <sup>9</sup>Piru chaynu rurarllapamatapis, mana masqa imatapis rurayta puytinqallapanachu. Chaqa tukuykami kwintata qukanqallapa, wakkunaqa yaru runakuna, imanutaq chay ishkey runakuna Moisespa kuntran tikrakan chaykuna yupaylla nir.

**Pablumi Timoteuta willan imanu  
kananpaq nir**

<sup>10</sup>Piru ukniy Timoteo, qamqami allita yaçhanki nuqa imanu yaçhachikuni, imanu kawsani nirmapis. Chaynullami yaçhankipis imanu allin kaqlata ruranaypaq yarpuni, imanu allita Amitunchikpi kriyini nir. Chaqa qamqami allita rikashayki ima katinpis mana das piñakushayta, wakinkunata llakipashayta, chaynulla ima katinpis kusalata shachinakuni ima nir.

<sup>11</sup>Chaynullami yaçhanki imanumi maylawpi purishaypispis kusalata qischakaray nir. Chaynullami ashwan yaçhankipis Antioquia, Iconio, Listra pwiblukunapi ima imanachimananllapapaq ikiypi puriranllapa nir. Chaypiqa yaçhashaykinu kusalata qischakaray. Piru Amitunchikmi tukuy chaykunamantaqa washamaran. <sup>12</sup>Chaqa chiqaptami Jesucristupi tukuylla kriyir, pay

munashannu kawsaqkunaqa, kusalata qischakanapaq ima kanchikllapa. <sup>13</sup>Piru chay mana allinta ruraqkuna, chay llullakuqkunaqami, waran waranqa limpu imananchikllapa. Chaqa ukkunata llullachishannu, paykunatapis ukkuna llullachir limpu imananchikllapa.

<sup>14</sup>Piru qam-shuypaqami kriyiq masiy Timoteo, chay kriyishaykinulla maydiyapis shachinakuy. Chaqa qamqami chay chiqap kaqpi kriyishaykipiqa kusalata kunfyakanki. Chaynulla yačhankipis mayqanmi chay chiqap kaqpaqqa yačhachishuran nirmapis. <sup>15</sup>Chaqa allita yarpuy, qamqami takshaykimanta-pacha Dyus nitin iskribikashakunataqa yačhakushayki nir. Chaymi chay yačhakushaykiqa, allita yanapashur shumaqlata purichishur ima, intrachishuyan Jesucristupi kriyishaykiraykulami washakayanki kanqa nir. <sup>16</sup>Chaqa Dyus nitin tukuy iskribikashakunataqami Dyusqa paylla nitin iskribiranchikllapa. Chaynu karmi kusala shumaqta yačhachimanchik, mana shumaq kawsasha byinninchikpaq willamanchik, mana allinta rurayasha kaynu ruray nimanchik. Chaynulla imatapis karanlata ruranaqqa ima yačhachimanchik. <sup>17</sup>Chaymi mayqanpis Dyusninchikpa kaqninkunaqa pay nitin iskribikashakunata allita intrakashanrayku imuraspis allinta ruranaqqa kayanqallapa.

#### Dyusninchiklapaqmi parlakunki

**4** <sup>1</sup>Allitami intrakay, Jesucristumi maydiyaqa mantakuq shamur tukuylla kawsaqkunata, chaynulla wanusha kaqkunamatapis allita rikar yačhanqa. Chaymi kananqa Taytanchik Dyuspa, chaynulla Amitunchik Jesucristupa naypanpi kusalata rugar nishayki: <sup>2</sup>Rir, Dyusninchikpa rimayninta imuraslapis yačhachikunaykipaq. Chaymi ima katin, mana ima katinmapis imanullapis yačhachikuyta kamay intrakananllapapaq.

Chaynuqami runakuna mana allinpi katinmapis nanaq nanaq willay, intrachiy, animachiy ima, kusa shumaqlata willar. <sup>3</sup>Chaqa čhamunqami uk tyimpu, chay tyimpupiqami mana mayqanpis uyakuyta munanqachu Dyusninchikpa shumaq rimayninkunataqa. Ashwanmi chay tyimpupiq runakunaqa ukman ukman imakunata yačhakuyta munanqallapa. Chaymi maskanqallapa achka ukman yačhachikuq runakunata. Chayna yanqa mana sirbiq uyakunayashanllapakunata yačhachitin, paykuna munashannullana uyakur kawsanllapa. <sup>4</sup>Chaymi ashwan chay runakunaqa chiqap kaqta mana kwintachamachu, chay yanqa kwintukunalatana uyakur kasurna kawsanqallapa. <sup>5</sup>Piru qam-shuypaqami ukniy Timoteo, kriyishaykirayku qischakay ima katinpis allin kaqlapi yarpur shachinakunki. Chaymi ashwan Amitunchikpaq yačhachikutki kriyir washakananllapapaq nir willashushanlata yačhachikunki. Chaynulla tukuy imata ruranaqkipaq Amitunchik nishushantaqami karanlata ruranki.

<sup>6</sup>Chaymi nishayki: Nuqapaqqami mana maychu wanur rir Amitunchikwananna kanaypaqqa. Chaymi ashwan wanurqa, Dyusninchikpaqqa uk ufrindita yupayna paypa naypanmanqa qimikayashaq. <sup>7</sup>Chaqa nuqaqami uk maqanakuq yupay kusalata shachinaku-sha kani allinlata yačhachikurqa. Chaymi ashwan tukuylla imata ruranaqpaq kaqtaqa kananqa tukchishana kani, Amitunchik munashannulla rurar ima. <sup>8</sup>Chaymi kananqa ashwan yarakuyani, imatapis karanlata rikar yačhaq jwis Amitunchik kurunayta qumananpaq diya čhamunanlatana. Piru manami nuqalatachu qumayanqa chay kurunataqa, ashwanmi wakinpis allita kriyir kusalata llakir ima pay shamunanpaq yaraqkunatapis quyanqa.

**Pablumi Timoteuta rugan  
watukunanpaq**

<sup>9</sup>Kananqami kriyiq masiy Timoteo, yaaqqa nuqalana kashayrayku kusalata rugashumi ama tardakurchu imanupis shamur watukumanaykipaq. <sup>10</sup>Chaqa kriyiq masinchik Crescentimi risha Galacia lugarman. Chaynulla kriyiq masinchik Tito-shuyupaqa risha Dalmacia lugarman. Chaymi paykunaqa mana pullaynachu. Piru Demas-shuyupaqami kriyishanmantaqa kay pachamanta kaq imankunalapaq masta llakiq kar, mana pullay kayta munar dijamar risha Tesalónica pwibluman. <sup>11</sup>Nataq ukninchikllapa Lucaslami kaypi nuqawan kidasha. Chaymi rugashayki chay ukninchik Marcosta imanupis maskar apapamanaykipaq. Chaqa payqami yačhachikutiyqa kusalata yanapamayanqa pullay karqa. <sup>12</sup>Chaqa Tiquicupismi mana pullaynachu Éfeso pwibluman kačhashayrayku. <sup>13</sup>Chaymi qam shamurqa, Troas pwiblupi ukninchik Carpupa wasinpi rakta atun račhpayta dijasha kani, chayta apamunki. Chaynullami apamunkipis papilmanta pillukaq libruykunata. Piru mastaqami ministini chay qaramanta libruykunata yačhachikunaypaqqa. Chaymi chaytapis apapamanki. <sup>14</sup>Chaymi nishayki: Chay runa Alejandro shutiq, chay jyirrukunata rupachir imakunata ruraqmi, nuqawan kusala mana allinta tukusha. Chaymi nini: Amitunchikmi paytaqa allita rikar yačhanqa imata rurashannulla nir. <sup>15</sup>Chayraykumi qampis chay runitumantaqa kusalata kuytakanki. Chaqa payqami nuqanchikkuna Amitunchikpaq yačhachikuyanchikllapa chaypaqqa kuntran tikrakasha kar, kusala mana allinkunata rimar ima purin. <sup>16</sup>Chaymi nishayki: Nuqa puntata Roma pwiblupi kar, karguyjunkuna qayachimatin

rityiqami, mana mayqan ukninchikkunapis pullayqa riranchu yanapamaqqa. Chaymi ashwan nuqala riray. Chaypaqqami Tayta Dyusta mañani ama chay ukninchikkunata mana allinta rurananpaq nir. <sup>17</sup>Piru chaynu ukninchikkuna nuqalata dijamatinllapamapismi, Amitunchikqa nuqawan kar, kusalata jwirsayta qur yanapamaran. Chaynami ashwan nuqaqa imanu kriyirmi washakayanqallapa nir ima kusalata yačhachikuray. Chaynu yačhachikutiyami chaypi kaq mana kriyiq runakunaqa tukuyula uyakumaranllapa. Chaymi chaynu karguyjunkunapa naypanpi karqami, uk liyunpa shiminpi yupayna karay. Piru Amitunchik Jesucristumi washamaran. <sup>18</sup>Chaynullami maydiyapis tukuy mana allin kaqkunamanta washamanqa. Chaymi ashwan kusala shumaq mantakuyashanmanna apar pullakumanqa. Chayraykumi ¡paylata tukuy tyimpupaq alabashunllapa! ;Chaynumi kanqa!

**Pablumi tukukananta saludan**

<sup>19</sup>Chaymi saludapamanki ukninchik Priscata, Aquilata, chaynulla ukninchik Onesiforutapis tukuy aylluntinta. <sup>20</sup>Erastuqami, Corinto pwiblupi kidasha. Nataq Trofimuta-shuyupaqami, qishaqta Mileto pwiblupi dijaray. <sup>21</sup>Chaymi nishayki: Imanullapismi manapis chay qasay tyimpu kashanllami shamuyta kamanki. Saludutami kačhamun qampaq chay ukninchikkuna Eubulo, Pudente, Lino, Claudia, chaynulla tukuyula kaypi wakin kriyiq masinchikkunapis. <sup>22</sup>Chaynulla Amitunchik Jesucristumi qamwan imuraslapis kanqa. Chaymi mañakuni Taytanchik Dyus tukuyula qamkunata llakipar tukuy imapi yanapashunanllapapaq nir.

Chaynumi kanqa.